





## MOLUNGNEN O

"Ni rara tajungji raraogo, ni alizüng tonga asemogo, ni tamangji yuogo."

- 2 Timothy 4:7

Temulung nung tenüngsang agi sünger, onok asür **SUNGKUMLONG JAMIR**'er kinungertemi kinunger, tembar aser shirnokisa onok mangyim jashi tia nung aliba mapang shi, tanüla, alirongsen aser sarasadem agi nongita yariogo, nenok ajak dang kanga pelaba lemsateper.

**Talisa item kija aser lokti tentettem dang kanga pelaba lemsateper:**

1. Shri. Tongpang Ozukum. Hon'ble Minister PWD (Housing & Mechanical).
2. Mr. Nukshimatong. EAC, SADAR Dimapur.
3. Er. Anunglalmchen. SDO, PWD (Mechanical).
4. The Hospital Management & Staff of CIHSR, Dimapur.
5. Mongsenyimti Senso Telongjem, Dmp.
6. Mongsenyimti Senso Tamang Telongjem, Dmp.
7. Ao Baptist Arogo Padumpukhuri, Dmp.
8. Ao Baptist Arogo Padumpukhuri, Dmp (Women Ministry).
9. Ao Senso Telongjem, Padumpukhuri, Dmp.
10. Purana Bazar 'B' Ao Baptist Arogo.
11. Ao Senso Telongjem, Purana Bazar 'B'.
12. Opangmedem SHG Padumpukhuri.
13. Lily SHG Padumpukhuri.
14. Mr. Imolangba & relatives.
15. Mr. Jongshimanen. Associate Pastor Youth (DABA).
16. Mr. Olemnungsang, Dmp.
17. Mr. Tamong Khamniungan.

Onok nem teyari agütsür ajak tenüng tetshia tenüngsang magütsütetba atema kanga sasaa bilemer, ajisüaka iba osang ajang nenok ajak dang kanga pelaba lemsateper aser Tulusang Tsüngremi nenok ajak molamoshia moajang ta sarasademtsür.

-Temeim Tsürapur, Adianu, Anükabang aser Kinungertem



Aso: 27/06/1992  
Asü: 26/06/2021

### GOVERNMENT OF NAGALAND DIRECTORATE OF SCHOOL EDUCATION KOHIMA : NAGALAND

NO.: ED/PLN/E-14/2016-17

Kohima, the, 1st July 2021

#### NOTIFICATION

It is hereby notified for the information of all concerned that Individuals/Societies/Organizations running Private Schools including Pre-Primary Schools without obtaining Permission from the Department of School Education, Nagaland were directed to close down their schools immediately vide this Office Notification of even number, Dated, 17th March 2020.

Whereas, it is brought to the notice of the department that few individuals/societies/organizations are still running schools without obtaining prior permission from the Department of School Education, Nagaland.

A onetime opportunity is hereby given to all Individuals/Societies/Organizations running Pre-Primary Schools without the Permission of the Department of School Education, Nagaland to apply for Permission in the prescribed format made available at <https://education.nagaland.gov.in> within 15 (fifteen) days from the date of issue of this notification. No application will be accepted for granting of Ex post facto permission to Pre-Primary Schools after the expiry of this grace period.

Further, this onetime measure is applicable only to Pre-Primary Schools and stringent punitive measures will be initiated against those running other levels of schools without prior permission from the department.

Issued by DIPR

(SHANAVAS C) IAS  
Principal Director.

## COVID-19 relief anogo 3 nung agütsüjemang: Tripura CM

**Agartala, Chiteni/July 1 (Agencies):** Tripura Chief Minister Biplab Deb-i, sorkar ketdangsürtem dang COVID-19 relief lemsüba maparen anogo asem tsünga tembanga inyaksangshitsü asoshi tetuyuba agütsüogo.

Tripura ajunga nung wara agi kongshir aliba kibongtem nem teyari agütsüba maparen ya Chief Minister Covid Special Package scheme kübok takaratiba nung inyaksü.

Revenue Department Secretary, Tanusree Deb Barma-i sangdong ka ajanga ketdangsürtem dang sub-division 23 mejeta semdangtsü aser teyari agütsüba maparen asadangtsü atema tetuyuba agütsüogo.



Biplab Deb (File photo)

Wara agi kongshir aliba kibongtem nem dry ration aser bank ajanga sen indang indanga agütsütsü.

Revenue secretary-isa, iba scheme kübok beneficiaries ajak nem sorkar-i agütsüba teyari ya

June 30 nungi July 2 tsünga tongtsütsüla, ta metetdaksüogo.

"Temalen shisema aliba teyari ya June 30, 2021 nungi July 2, 2021 tsünga anogo asem nung agütsütsü asoshi telemetba agiogo," ta sangdong nung shia lir.

Tripura nung Covid-19 wara tanaben poktetshiba mapang sorkari lokti nung tekübokba jenjang nung aliba telok nem senotsü teyari agütsütsü sangdonga liasü.

Sub-divisions 23 atema ketdangsür kaka shimogo. Parnoki sub-division tem semdangtsü aser tensa ajunga kanga junga asadanga sülen tatemi Chief Secretary nem parnoki ngutetba osang agütsütsü.

## Akhil Gogoi tepuokdak nungi chiokogo

**Guwahati, Chiteni/July 1 (Agencies):** Assam lenir Akhil Gogoi, shiba 2019 küm citizenship law anema longkak aitba dak sendakba nung aija tepuokdaki yok, pa Brehostibarnü chiokogo. Special NIA (National Investigation Agency) court kati ken o ka nung pa maitsüba sülen ghonda ishika lir pa tepuokdak nungi chiok.

Gogoi ya anti-terror law UAPA [Unlawful Activities (Prevention) Act] kübok aitsür liasü. Maneni pai sorkar anema jembiba atema aitsür liasü. 2019 küm Parliament nung Citizenship Amendment Act agizükba sülen Assam nung mepetmesü tulu adokba dak sendakba nung pa nem teyari agütsür asem apu saka parnok asema iba ken o nung maitsü.

Okadak ajanga obendang agütsüba sülen Gogoi-i, "tanü ya independent judiciary atema otsüsütsü anogo ka," ta ashi. Pa April-May Assam elections nung Sivasagar constituency nungi MLA asütsü shimogo. "Ajak len Indian polity aser policy nung democratic inyakyim kecha mangur. Saka iba obendang agütsüba ajanga timla agütsür. UAPA ya ozüng tamajung aser agintsüla. Tang ni iba anti-terror law anema raratsü," ta pai ashi.

BJP aija pai, "Assam nung yimden yimsüsüba aser loktiliba inyakyim ya democratic yimya nung maor. BJP sorkar inyakyim kecha nunga democracy tanüla mali. Nai social media mesera lokti senden nung langka danga shira na anema ken o benoker mesera apur. Parnoki (BJP)

Assam ya Uttar Pradesh ama kümdaktsütsü," ta pai ashi.

Election akokba dak sendakba nung pai, "election nung takok anguba ya otsüsütsüka lir. Election atema nüboyimba mapang ni senpak ka danga mintok," ta ashi. Gogoi-i nüboyimba sentong nung shilem magitetaka election kokogo.

Mepetmesü aketba citizenship law dak sendakba nung arishi küm 45 tain leniri, "assembly nung ni nüburtem ola asütsü," ta ashi.

2019 küm Gogoi lenisüba nung lokti tentet 61-i CAA anema longkak aita liasü. Azütokshia longkak aitba sülen Assam (Sivasagar, Dibrugarh, Gaurisagar, Teok, Jorhat) kübok tesem balala nung pa anema ken o aika benok. Ken o tem rongnung Chandmari aser Chabua nung benokba ken o ana NIA-i agizük.

Taoba ita Chabua nung benokba ken o nung pa maitsü aser Brehostibarnü Chandmari nung benokba ken o angadanger pa aia mali ta sangdongogo.

NIA Special Judge Pranjal Das-i, Gogoi aser pa nem teyari agütsür Dhairjya Konwar, Manas Konwar aser Bitu Sonowal nung Chandmari ken o nung maitsü, kong parnok Maoist den sendaktepa lir aija liasü.

Tepuokdak amungba mapang Gogoi coronavirus tashidak agi atong aser Gauhati Medical College and Hospital (GMCH)-i anir ao, kong pa anxiety atema treatment agia liasü, ta Assam Chief Minister Himanta Biswa Sarma-i taoba mapang ashi.

## Manipur district 7 nung COVID-19 curfew atsülanger

**Imphal, Chiteni/July 1 (Agencies):** Manipur kübok district tenet nung COVID-19 curfew maneni July 30 tashi benoktsü sangdongogo.

State nung anogoshia nisung aika dak tashidak potetba den tashidak dak sendakba tasübatem ajangshiba sülen district tenet nung maneni Curfew benoka atatsü atema telemetba agiogo.

Manipur sorkari COVID-19 curfew atsülangshitsüba district tem rongnung Imphal West, Imphal East, Bishnupur, Kakching, Thoubal, Churachandpur aser Ukhrul district tem densema lir.

Manipur sorkar sangdong ka ajanga ashiba agi, curfew mapang tenokdangba karbo salatsütsü.

"Wara azioktsü atema tensa kanga kümdanga asadanga aliba den vaccine telongjunga agütsütsü nüngdaka lir," ta sangdong ajanga metetdaksü.

Aonsotsü ayokertem aser grocery dokantem July 1, 4, 7 aser 10 nü anepdang 7 ako nungi 10 ako tashi lapoktsü temelaba agütsüogo.

"Covid tensa aser vaccine agütsüba inyakyim apir tenokdangbatem salatsüyonga aotsü," ta kasa sangdong ajanga metetdaksü.

## Assam nung black fungus agi nisung ka süogo

**Tinsukia, Chiteni/July 1 (Agencies):** Brehostibar anepdang mucormycosis, koba dang black fungus ta ajar, iba tashidak agi Dibrugarh nung arishi küm 53 tain tebur ka süogo aser pa ya upper Assam nung iba tashidak agi asür mezüngbuba lir.

Assam nung rhinocerebral mucormycosis tashidak agi asüba osang mezüngbuba sangdongba sülen hopta trokshi lir tang iba osang sangdongo. May 19 nü Nagaon district nungi arishi küm 27 tain tebur ka iba tashidak agi asü.

Tatalokba jangjashija Assam Medical College and Hospital superintendent Prashanta Dihingia-i, COVID-19 tashidak

keta mali ta tendangtetba sülen anogo ishika lir nisungba ya June 15 nü mozükidangi anir aru. "Pa mozükidangi anir aruba mapang tangula junga mesashitetba ashishia liasü aser tatsüka lir black fungus tashidak keta aliba potet," ta pai ashi.

"Tia maka shirangsang ya black fungus tashidak agi tanep süogo," ta pai ashi.

Source balala ajanga ashiba agi, Subhash Sahu ya Lakhimpur district nung lia liasü aser June 12 nü COVID-19 tashidak tendangba mapang pa dak tashidak mepotet.

Assam nung tang tesem balala nung nisung trok tema dak black fungus tashidak poteter lir.



### YMCA, Dimapur Nagaland-i timtemertem nem teyari agütsü



**Dimapur, July 01 (TYO):** Brihostibarnü YMCA, Dimapur Nagaland-i Dimapur kübok Zukiye yimdak teyari nüngdakburtem nem teyari agütsü aser Railway Staion nunga ki malir nisung 150 dak tema nem chiyungtsü agütsüogo.

Y's men aser YMCA India indang 'Heal the World' project kübok timtemertem nem teyari agütsüba maparen ya tenzük.

Young Men Christian Association (YMCA) Nagaland Tir, Dr. Andrew Ahoto Sema leniba nung office

ketdangpurtemi amitsür 30 aser BPL kibong 20 semdanga parnok nem jang, menjang, totzü, aansotsü aser sapon densema nüngdakba oset balala agütsü. Iba dak alia parnok Dimapur Railway Station nunga ki talidak malir 150 dak tema nem chiyungtsü agütsüba den külemi tajemtsü tzi agütsü.

Covid relief dak sendakba nung parnok teyari agütsü; nisung karibo iba ya yimjak nung sangdongtsü atema inyakba ama bilema alitsüa akok, ajisüaka YMCA-i

temeim mapa inyaksü atema ajak ajungshitsü nukjidong nung iba osang lemsateper, ta parnok metetdaksü.

"YMCA-i tang ama tensa mapang nung nisung ajak dang tangar yaritsü ajungshir. Nisung ajaki peü akokba agi tangar yarira alima ya tepor tajungba aser temeim aliba tesem ka akümstsü. Onoki maneni nübör tenzükba mapa inyaksü aseer tangar-a ajungshitsü. YMCA-i pelar aser maneni mapa agi tamang sayua nübörtem atema inyaksü," ta YMCA-i metetdaksü.

### CCP küm 100 ajungba mapang CAG züngsem 400 dak tema puogo

**July 01, 2021:** Chinese Communist Party (CCP) küm 100 ajungba mapang nung parnok Church of Almighty God (CAG) züngsemtem aputsü atema tetuyuba agütsü.

Bitter Winter osang ajanga ashiba agi, taküm April ita nungi June ita tashi nung China nung CCP-i CAG züngsem 400 dak tema puogo.

China nung Communist sorkari kanga reshikangshiba tamangba teloktem rongnung Church of Almighty God (CAG) densema lir.

Shanxi Province nung State Security office-i sangdong ka ajanga, CCP küm 100 ajungbamong mapang nung tensa azüoktsü atema CAG züngsemtem apur, ta metetdaksü.

Bitter Winter den jembidang Henan Province nung sorkar mapa inyaker kati, CCP küm 100 ajungba benjung amongtsü atema renemba mapang nung CAG züngsemtem aputsü atema sorkar dang tuyua liasü, ta ashi.

Taküm April ita tom nungi

tenzükba June ita tom tashi nung Henan province kija nunga CAG züngsem 265 puogo, ta osang angazüker.

Bitter Winter den jembidang CAG züngsem kati, police temi sanitation workers ama sübor lar ki ita asem tashi mita aruba sülen la apu, ta metetdaksü.

Inner Mongolia Autonomous Region kübok Baotou yimti nunga CAG züngsemtem aputsü atema police-i inyakim tenzükba sülen anogo ana kija nung CAG züngsem 70 apu.

May 19 nungi May 25 tashi nung Guandong southern province kübok Foshan, Guangzhou aser Zhuhai densema yimti aika nung CAG züngsem 160 jungnüa puogo.

April ita nunga CAG züngsem 116 pua liasü aser ketdangsertemi iba Arogo nungi RMB sen 750,000 RMB den nija oset aika auyaogo.

Shanxi northern province nunga June 15 nungi tenzükba CAG züngsemtem apur aser July ita tashi nung ajak aputsü tebilemba lir, ta sorkar ketdangser kati metetdaksü.

June 26, 2021 tashi nung China tesem balala nung CAG züngsem 403 puogo. Changzhi yimti nung züngsem 124 apu, Lüliang yimti nung 83, Jinzhong yimti nung 67, Linfen yimti nung 96 aser Datong yimti nung 33 puogo.

China nung tentetba CAG telok ya nisung aikati ashishir. CAG mesüra Eastern Lightning cult, ta ajaba telok yagi kaketttem adoker aser Facebook pages aika yangluba den Laishiba nung ajemdaker artwork adoker, aser item nisung puatsüsa lir.

CAG teloki, Kibur Khrista tetsür ka amai alimai tanaben aruogo, aser la tenungji Yang Xiangbin lir ta ashir. Iba denji külemi Tasen Lai-a "The Word Appears in the Flesh" ta ser melenogo.

Tsüngremi tetsür ka ajanga jembir ta parnok tesayuba agütsür, aser lai jemibatemi Tsüngrem dang nungi jungkai adokba otem lir, ta parnok indang kaketttem nung shia lir. Itemji kaket, videos, computer movies aser artwork nung adoker.

### Indonesia nung Tenla ki ka rongdoktsüogo

**July 01, 2021:** Indonesia nung West Sulawesi province kübok Sumarorong District nung aliba East Batang Uru yimdak Tenla ki ka rongdoktsüogo, ta International Christian Concern (ICC)-i metetdaksü.

June 27, 2021 anepdang zünggia mejangjaba nisungtemi East Batang Uru yimdak Tenla kiji rongdoktsü. Tenla kidang mi

mesenoktsüdag parnok i tamasa furnitures densema oset balala raksaja liasü, iba sülen parnok Toraja Mamasa Arogo Tenla kidang mi senoktsü.

Police-i ashiba agi, Tenla kidang choir takdang, kongshi kongki balala aser documents bo ajak meshi-meshia rongdokogo. Tenla kidang nisung shinga maliba agi nisung yiruba mesüra

asüamababo kecha maliasü.

Mamasa Police-i Sumarorong Police Criminal & Investigation Unit den senteper bushisingdang tenzükogo. Nisung ajak mejanger lia anepdang zünggia Tenla kidang mi senoktsüba agi aibelenertemji shingaia mangu, ajisüaka police-i melung melemi nisung ka puogo, ajisüaka paji tekolok tera meshidak.

### ANOGO ABEN TSÜNGREM DEN

#### Ajak tesülen tokjang

Aser Pai parnok dang ashi, Kü sülen anidakang aser Ni nenok nisung apurtem kümdaksüdi. Mathi 4:19

Yohani Yisu baptisür külen, pai nütsüng ana dang Yisu kong lir metettsü asoshi pa sülen aotsü ashi. Ana rong nung kabo Andria liasü. Yisu ajurua Pa den jembir külen Yohani parnok dang Khrista sayu ta parnok angatetta aru. Idangjisa Andriai teti Simon Yisu dangi anir aru. Tesülen Yisui ango pur adianu ana dang "Kü sülen anitakang" ta ashi. Pai parnok dang parnok akaba ajak tesülen yujang ta parnok tajangzük anguba mapa, parnok chiyongtsü aser parnok tebua- parnok Pa nütsüngtem akümstsü asoshi. Idangji Yisui parnok koda amshitsü parnok dang ashi. Pai parnok temetetba ango bushiba nung masü saka nisung tanelatem bushiba nung amshitsü ta parnok dang ashi. Tesüiba nunga parnok Yisu ajurua liasü aser Pa kechi koma nisung parnok metetta liasü, Pa sülen anidakra Pai parnok taküm teti asoshi melenshitsütsü parnok mulungtet.

Asenok asoshi lessonji tanabuba tekong nungjia sayur. Idangyongjisa parnok parnok zütsük toktsü aser Pa sülen anidak. Parnok Yisui ajaba nung tashi anga, parnok akaba ajak toktsü. Tanü Yisui asenok shia ajar. Tanü Pai asenok tejangraba toktsüdaktsüner aser Pai asenok taküm agütsüba nung ranglokdaktsüner. Iba nung shilemji shirnoki Yisu memeteti lir parnok Pa den teti tatem maka taküm aliba osang tajung lemsateptsübaji lir. Tanü na aser ni nisung apur akümstsü akok. Tasüngdangbaji ya, asenokia Andrew aser Peteri ama, idangjisa Pa sülen anidaktsü shimettsü asü?

Tsüngrem, tanü ni nisung apur ka asütsü Ne dang sarasademer. Ne taochi aser yimlibilem lemsateptsü mapang tajung agüjang. Amen.

### OFFICE OF THE DIMAPUR AO BAPTISTAROGO

DIMAPUR - 797112, NAGALAND

Temeim arogo purtem ajak dangi Yisu Khrista temeim salem tulu bener arutsür.

Amangbapurtem tamang sarasadem langzua, Tsüngrem tashi tulu agi tashitak wara tajemba kümdaktsüba asoshi asen Kibuba tenung sangdi. Ano maneni Tsüngrem taochi asen lima aser asen nübör den metitemi lidakjang ta sarasademtsü ayungzüker.

Asen arogo July ita online kibong tekülem nung atentsü ken number agütsür.

Anogo	Tetenzük Ken	Tatem Ken
3 <sup>rd</sup> July 2021 (Sat.)	54	126
4 <sup>th</sup> July 2021 (Sun)	437	287
7 <sup>th</sup> July. 2021 (Wed.)	159	176
10 <sup>th</sup> July 2021 (Sat.)	175	189
11 <sup>th</sup> July 2021 (Sun)	60	285
14 <sup>th</sup> July. 2021 (Wed.)	200	218
17 <sup>th</sup> July 2021 (Sat.)	247	255
18 <sup>th</sup> July 2021 (Sun)	54	133
21 <sup>st</sup> July. 2021 (Wed.)	186	264
24 <sup>th</sup> July 2021 (Sat.)	266	187
25 <sup>th</sup> July 2021 (Sun)	24	414
28 <sup>th</sup> July. 2021 (Wed.)	270	257
31 <sup>st</sup> July 2021 (Sat.)	253	280

Lokti tekülem makatetaka pei kibong tekülem nung temoatsü anguba osang aika angashidang Tsüngrem tenung kanga asanger. Shir kibong nungsa kibong tekülem tashi taitba yanglutetogo, iba asoshi kanga pelaa bilemer aser nenok kibongtem asoshi Tsüngrem nem tenüngsang agütsür. July asoshi-a tekülem kibongisa bener yoker. Tekülem nung kinüngertem ajaki shilem balala lemsaa agitsüji Tsüngremer maongka ta angateta, kibong züngsem ajaki shilem tajung agitsü ajungshir. Tsüngremi arogo pur ajak kumzuka yujangma.

Rev. I. Wati  
Pastor  
Dimapur Ao Baptist Arogo



**OLONG PAITEP # 5862**

1			2					3		
4								5		
						6				
			7							8
		9								
							10			
11							12			
13										

<b>TIPILEN</b>		<b>LANGTSÜNGLEN</b>	
2. Teka mapa tajung	- (8)	1. Anepalua inyak	- (7)
4. Anakshinüba	- (5)	2. Teptsü	- (4)
5. Süoshi agi tazü	- (4)	3. Nok agi raratep	- (6)
9. Aria bilemtep	- (7)	6. Kibong aküm	- (4)
11. Ajemalu ozü	- (4)	7. Nüji masü	- (4)
12. Tzü an	- (5)	8. Taruba küm	- (7)
13. Teben teloktep	- (8)	9. Teka shidok	- (6)
		10. Meputep/Mapet	- (4)

**OLONG PAITEP # 5861 TELANGZÜBA**

<b>TIPILEN :</b>	<b>LANGTSÜNGLEN :</b>
1. Yimlibilem, 4. Anak, 5. Tangar,	1. Yongya, 2. Moko, 3. Marok,
7. Aya, 8. Arong, 11. Par,	5. Teronem, 6. Nung, 8. Amajok,
13. Lemjem, 14. Oagi, 15. Mulung.	9. Jangzü, 10. belem, 12. Rong.



**DEVOTIONAL SENTEP NUNG PASTOR-I YI MAJEMTSÜ INDANG JEMBIR:**

**Pastor** : Yi ajemba ajanga alima nung aliba lokti, kibong, kija taküm ajak raksadaktsür. Tatishitsü agi kü nem pangdak tashi agütsüra ni anir Rum ajunga bendentsü aser ayong nung shioktsütsü, Nagaland nung aliba Whisky ajak okshia bendener ayong nung meküpoktsütsü, Brandy ajak bendena ayongsa yima or merepoktsütsü. Anungji amangbapur ajaki Yi nungi jenbua lidi ni ta ayongzüker.

**Menden** : Tsüngrem o tarok anganüa agütsüba atema kanga pelar. Tang senshia aotsü Ken züngdangba 207- Ayong Nungji Senteptsü Asü, Choir Master Alokbai anir tendi.

Lilir : WhatsApp

**TANÜBO NAI LANGZÜANG**

**Q. Agni P missile indang range ji kopika?**  
 A. 1,000 to 2,000 kilometres      B. 1,400 to 2,000 kilometres  
 C. 1,600 to 2,000 kilometres      D. 1,000 to 4,000 kilometres  
 (Taruba adok nung onoki langzütsü)

**YASHI ADOK TELANGZÜBA: SBI**

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Keno**

(n) Nisungtemi o agi ken aser ken agi o kümer atenba aser jembiba (expression of thought)

\* Senden nung adenertemi **keno** ajak tokzüka jembiteper külen telemtetba agi.

**Kenok**

(v) aonpu nungi agiteter auso nung enokba (ladle out)

\* Ni chiyong dang aon tajung asüba agi tuluka **kenok**.

**NAI-A YA METETTER MA?**



Professor Stefan Klein-i "AirCar (V5)" ta nüngja agütsüba flying car tasen ka yangluogo. Minute 3 nung iba gari yagi flying car kati melenteter aser nisung ana mentetba flying car model touzük seret 1,100kg lir. Hombarnü, Klein Vision flying car yagi minute 35 nung Slovakia indang Nitra aser Bratislava international airport tsüngda takok ngua yimtetogo. Bratislava airport nung anenzükba sülen, iba flying car indang tashikang külepa gari kati melen aser Klein Vision CEO Stefan Klein aser Zajac nati iba gari anir airport nungi tukadok. AirCar ta nüngja agütsüba hybrid car-aircraft nung 160 horsepower aketba BMW engine amenoka yanglu aser petrol ajanga engine inyakyim achaayangtsür. Iba flying car yagi ali nungi pilar anüng tom süklep 8,200 tashi nung yimzür aser kilometer 1,000 tashi yimteter.

**SUDOKU # 5902**

**TELANGZUBA # 5901**

2	8	5			9	4	1	3	5	3	7	4	9	8	2	6	1
	6	1				2			6	1	4	2	3	5	9	7	8
	3		1		2	6		7	2	9	8	7	1	6	4	5	3
						5	2		8	5	1	9	2	7	3	4	6
	5	2	4	6			9		4	2	3	6	5	1	8	9	7
8	9			1		4			7	6	9	8	4	3	5	1	2
	7	8	3			6			1	4	5	3	6	2	7	8	9
3					7	5	2		9	7	2	1	8	4	6	3	5
9		4		8	6	7	3		3	8	6	5	7	9	1	2	4

**OJANG LUTEP # 5447**

SÜNÜMTZETG :   
 ANAODG :   
 NGDSÜI :   
 GTILUN :   
 GERPON :   
 AALU :   
 YONAGJI :   
 ÜITEZ :   
 MTSAYIÜ :   
 KAKO :

**OJANG LUTEP TELANGZÜBA # 5446**

SHISABULU TIMTEM ASER NEKENBELEM NUNG ALIBA MAPANG KA TANEPTSÜR AJURU

**TAN HOPTA ATEMA - KOMA SÜLA ?**

**Q. Impur Mission Hospital ya ABAM-i lenmang bushitepa Community Health Centre jenjang tashi danga tua lapoktsü lenmang bushitep nung koma süla ?**



Dharamsala, July 01, 2021: Brihostibarnü Chinese Communist Party (CCP) küm 100 ajungba anogo nung Dharamsala (Bihar) nung Tibet nungeri longkak aitba mapang nisung kati China Tir, Xi Jinping ama sobur azü mesükba tzu nung mena aliba noksa nung angur.

### India nung anonisung 48,786 dak Covid putet aser 1,005 asü

**New Delhi, July 01 (Agencies):** India linük nung anonisung 48,786 dak coronavirus putet aser iba tashidak agi nisung 1,005 süogo; tang tashi nung linük nung coronavirus tashidak agi shiranga asür ajak senteper 3,99,459 jungogo.

Tesüiba ghonda 24 tsüingda India nung coronavirus agi shiranger 61,588 anepogo aser tang teshirangdakpur 5,23,257 dang kümogo, ta Union Health Ministry-i metetdaksü.

Bodhbarnü samples 19,21,450 tendanga liasü aser tang tashi nungbo linük nung samples ajak senteper 41,20,21,494 tendangogo, ta

ICMR-i metetdaksü. Tang anogo shia coronavirus positive putetba shilem 2.54 dang kümogo aser hopta shia positive putetba shilem-a 2.64 dang kümogo.

Tanü agi anogo 49 buba linük nung iba tashidak putetba dang nungibo shiranger anepba timba. Tang tashi nung iba tashidak agi shiranger 2,94,88,918 anepogo, aser iba tashidak agi shiranger asüba shilem 1.31 dang kümogo.

Tesüiba ghonda 24 tsüingda iba tashidak agi nisung timba asüba state temji Uttarakhand (221), Kerala (142), Maharashtra (141), Tamil Nadu

(113) aser Karnataka (111) state tem lir.

Linük nung iba tashidak agi nisung 3,99,459 süogo aser nisung timba asüba state temji Maharashtra (1,21,945), Karnataka (35,040), Tamil Nadu (32,619), Delhi (24,977), Uttar Pradesh (22,591), Wset Bengal (17,708) aser Punjab (16,052) state tem lir.

Brihostibarnü India nung mozü yangluba company-Zydus Cadilla-i, parnoki yangluba coronavirus vaccine linük nung amshitsü atema parnoki India drug regulator dang temelaba meshia asüingdangogo, ta metetdaksü.

### Linük rongsen atema Agri universities nungdak: Sharad Pawar

**Mumbai, July 01 (Agencies):** Brihostibarnü NCP Tir aser taoba mapang Union Agriculture Minister, Sharad Pawar-i, linük rongsenkettsüing tashi aittsü atema agricultural universities ji kanga tongtibang, ta ashi.

Maharashtra kübok Kolhapur district nung DY Patil Agriculture & Technical University semzüksüba sentong nung jembidang pai, "Aluyimba tsütsü terenlok lira rongsenkettsüing jenjang tajungba akümtsü. India nunger rongsenkettsüing jenjang tajungba akümtsü aser tashi aittsü atema item ama universities ya nungdak. Item

ama universities nung research ajanga tasen apiteta inyakba den technology tsütsü tenrenlok aliba ajanga aluyimba sector nung yaritsü," ta metetdaksü.

Iba sentong ya taoba mapang Bihar, Tripura aser West Bengal nung Angh inyaksang, Dr DY Patil leniba nung agia liasü. Iba university ya academic year 2021-22 nungi tenzüksü.

Kasa sentong nung jembidang DY Patil Group Tir, Dr Sanjay Patil-i, "Iba university nung shisaliokji theory nung dang masü saka practical nunga rangloksü. Lenla ajungalen nungi asadangba sülen curriculum renemogo," ta

metetdaksü. Iba university nung tongtiji agriculture lir, ajisüaka architecture, management aser engineering tsütsülena tesayuba agütsütsü, ta university sangdong ka ajanga metetdaksü.

Maharashtra nung minister aser DY Patil Group nunga tatong Tir, Satej Patil-i, iba university curriculum nung tongtibangbaji agricultural research asütsü, ta ashi.

Iba university nung national aser international careers atema skill development ajungkettsütsü, ta Kolhapur-South MLA aser DY Patil Group trustee, Raturaj Patil-i metetdaksü.

### India nunger ajak tenüing nung doctor tem dang pelar: PM Modi

**New Delhi, July 01 (Agencies):** Coronavirus wara mapang nung nisung lakh aika kümzükba atema linük nung doctor tem dang pelar, ta Ato kilonser Narendra Modi-i metetdaksü.

Brihostibarnü National Doctors' Day anogomong nung Ato kilonseri, "Tesüiba küm ka ser tesadang mapang nung doctor temi nüburttem junga tenzükba tishitsü tajung ka lir; India nunger crore 130 tenüing nung ni parnok (doctor tem) dang pelar," ta metetdaksü.

Paisa doctor tem dang research agitsü, vaccine indang tajanzük anguba aser mapang shidak nung tashidak puteta treatment agütsüba osang bendena ayutsü mepishi.

Paisa, health sector atema budget nung senotsü anasü agi tali lezmükja sen 2 lakh crore lezmüksüogo, aser deficient health infrastructure atema credit guarantee scheme sen crore 50,000 lezmüksüogo, ta metetdaksü.

Tanga linüktem den medemdangra coronavirus wara mapang nung India nunger healthcare system junga liasü, ta pai ashi.

"Tangbo medical nisungtemi yoga ajungkettsür. Covid agi shirangertem anepba sülen yoga ajanga tajanzük anguba indang medical science institutions-i shisadangdar," ta pai ashi.

Ano tanga osang ka nung, Ato kilonseri Minister tem dang taruba tzungluruwa mongpu senden nung Opposition-i coronavirus wara dak sendakba nung Centre sorkar aitsütsüa akok, anungji iba atemaji junga renema alitsüla, ta tuyuogo.

Opposition party temi Centre sorkari coronavirus wara junga maziüktetba aser vaccination inyakyim majungba atema aitsür, aser iba dak sendakba nung Modi-i Minister tem dang wara onük nung ajemdaker opposition-i Parliament nung timtem agütsütsüa akok, anungji iba atemaji junga renema alitsüla, ta metetdaksü.

Paisa, vaccination dak sendakba nung opposition-i tim masüba otem jembiba ajanga aikati vaccine agitsü arendaka liasü, ta ashi.

State temi vaccination inyakyim junga meinyaktetba agi Centre-i vaccination inyakyim bendanga agitsüsa aküm, ta paisa shisem.



July 01, 2021 nü Patiala nung Punjab Pardesh Beopar Mandal nungi züngsemtemi linük nung petrol aser diesel jenjang atuba anema longkak aitba noksa nung angur.

### UP election atema SP-i party tilatem den lokteptsü: Akhilesh Yadav

**New Delhi, July 01 (Agencies):** Sangküm küm tetenzüklen Uttar Pradesh nung Assembly elections agitsü lia Brihostibarnü Samajwadi Party tongti aser taoba mapang state chief minister, Akhilesh Yadav-i, taruba election atema par party-i party tilatem den teloktep yanglutsü, ta metetdaksü.

Osangbener den jembidang Yadav-i, "Samajwadi Party-i party tilatem den teloktep yanglutsü. Uttar Pradesh nung nüburttemi temelenshi aginer, anungji nüburttemi temelenshi atema vote agütsütsü," ta metetdaksü.

2022 UP Assembly election ajanga state nung democracy asüingsashitsü, aser par party-i state nung jenjang tajung angutsü, ta pai ashi.

State nung ruling party- BJP aija pai, BJP-i parnok indang manifesto amadokogo, anungji

parnoki jana bendendak indokogo, ta ashi.

"BJP-i (UP nung) sorkar akümba anogo nungi parnok indang manifesto amadokogo. BJP-i parnok indang manifesto jana bendendak indokogo ta ni bilemer," ta pai ashi.

Bodhbarnüa Yadav-i, par party-i assembly menden 403 nungi menden 350 nungbo takok angutsü, kechiyong nüburttemi BJP sorkar anema nokdaker, ta jembia liasü.

Tawa Uttar Pradesh nung panchayat election nung menden 3,050 nungi Independents-i menden 1,081 nung takok angu, Samajwadi Party-i pusemba candidate temi menden 851 angu, BJP-i pusemba candidate temi menden 618 angu aser BSP-i pusemba candidate temi menden 320 dang ngua liasü.



July 1, 2021 nü Ranchi nung National Doctors Day amongdang doctor tem tangokba noksa nung angur. Tanü Jharkhand Pradesh Congress Committee (JPCC)-i doctor tem nem tetushi agüja liasü.

# Indonesia nung emergency mera benoktsü

**Jakarta, Chiteni/July 01 (Agencies):** Coronavirus tashidak tali menatepa aoba azüoktsü mechi Indonesia nung July 20 tashi emergency mera kar agitsü, ta Tir Joko Widodo-i Brehostibarnü ashi.

Alima nung nütsüng yongsük timtiba aliba linüktem rongnung jenjang pezübuba nung aliba linük nungya tawa virus tali akumer, anungji tenokdangba tesashiba mebenokra India nung wave tanabuba agi kongshiba ama timtem ajurutsü, ta health tsütsü mongintemi ashi.

"Asenok ajaki tashi anga aser Tsüngrem taochi agi asenoki COVID-19 tashidak menatepa aoba ajemdaktsütsü aser yakta nüburtem akhi ama alitsü ta ni amanger," ta tiri tenokdangba tasen sangdongba mapang ashi.

Anogoshi virus cases 10,000 dang nungi tajemba kumdaktsütsü nükjidong nung Honibarnü nungi tenzükba tenokdangba kübok nisung tem senzüsempomba aser tayimtsü nung senzüba nung tenokdangba tali agütsür, restaurant nung chia-ajemba nokdanger aser kanga tongtipang masüba office tem shibangtsür.

Item tenokdangba ya nütsüng timtiba aliba Java asetkong aser anisüngzükdak Bali asetkong nunga amshitsü. Southeast Asia nung

coronavirus tashidak ya Indonesia nung tamajungtiba pokteta tesüba anogo 11 tali tamajungba liasü, aser Brehostibarnüa nisung tasen 24,836 dak iba tashidak putet aser nisung 504 asü.

Indonesia nung COVID-19 tashidak agi nisung million 2.2 menepa lir aser nisung 58,995 süogo.

Health minister Budi Gunadi Sadikin-i COVID-19 tendangba maparen tali tashi itshitsü shiogo aser mozü aliba nung yaritsü atema Australia-i sen million A\$77 agütsütsü aser ano Moderna Inc (MRNA.O) vaccine million pezü densema ano aika arutsü, ta ashi.

Indonesia nung China indang Sinovac mozü timba amshir, aser January ita tashinung nisung million 181.5 nem iba mozü agütsür alitsü nükjidong lir, saka parnoki nükjidong ayuba shilem 7.5 dang tongteta lir.

April aser May ita India nung kanga sashia putetdaktsüba Delta variant ya Indonesia nunga menatepa aoba mapang lir.

Java nung mozüki ajunga shiranger agi tasünger lir. Linük yimtiba, Jakarta nung emergency ward karbo mozüki kima gari anentsü mesemteta alidak süki amenoka amshir, aser kidang shiranga aliba kinungertem atema oxygen tank alitsü nüburtem atatepa liasü.



Washington nung aliba White House indang South Court Auditorium nung sentong ka akaba mapang bill kar nung US Tir Joe Biden-i meyongnem agütsüdang pa anasa House Speaker Nancy Pelosi nokdaker pa den o jembiba noksa ka yangi angur.

# DRC azüdokshi nung nisung 10 takum sama

**Beni, Chiteni/July 01 (Agencies):** Democratic Republic of the Congo anüdoklen Beni yimti nung aonung sangwa amakba lendong nung nisung tajemba agi ter asü, koba Allied Democratic Forces (ADF) telok tenüng asener.

Lendong agütsür telok kati iba yimti indang Beu district nung ayatirm nung ki kar nung mi senloktsü, kidang nungi jena aor dak injang khaloktsü aser kar dak nok-o-nü agi yirutsü, ta yangji alirtemi Brehostibarnü ashi.

Tang tashi Rwangoma tesem nung iba lendong agütsüba tenüng agir shinga mali, saka ketdangtsürtemi ADF tenüng asener.

"Yasüng ADF tsükchirtemi

lendong agütsü. Civilian ter shi takum samaogo," ta lieutenant Anthony Mualushayi-i osangbener dang ashi. Beni indang general hospital nung nisung tasü mang ayudak osangbener temi nisung tasü mang ter angu.

Nisung kar samar bushir, anungji asürtem ya tali akumtsü akok.

Ali rongsen talubosa aliba DRC anüdoklen ADF indang telungpur telok 122 shi lir aser parnoki 1996 nungi 2003 tsüngta regional war ana tashi raraogo, aser parnoki lendong agütsüba tenüng kodanga magir.

Beu nung civil society lenir Gloire Kivetya-i iba lendong ya ADF ajanga agütsü, ta tenüng asener. Tensa asadangba telok, Kivu Security Tracker-ia ADF

dak temolung malemer, ta ashi.


ADF ya 1990s mapang Uganda anüolen nungi adoka Islamic state tentetsü nükjidong sangdonga liasü, aser 1995 küm nungi parnok ya DRC anüdoklen amenoka alir.

DRC nung Catholic arogo ajanga asadangba nung, 2013 küm nungi tenzuka nisung 6,000 shi ADF ajanga tepsetogo, ta ashir.

2017 küm nungi tenzuka tang tashinung North Kivu province kübok Beni tesem nung civilian 1,200 dak tema ADF ajanga tepsetogo, ta KTS ajanga ashir.

March 10 nü United States-i ADF ya bendanger kiralongrar telok ka, ta tenüng jaloktsü aser iba telok indang lenir Musa Baluku ya ISIL (ISIS) den sendaktepa lir, ta ashi.

# Bendangeri China mesüshira timtem ajurutsü: Xi Jinping



**Beijing, Chiteni/July 01 (Agencies):** China nung Communist Party tenzükter Brehostibarnü küm 100 ajungba anogomung nung Tir Xi Jinping-i bendanger dang par linük mesüshira tekolak lepdoktsütsü, ta tekumdangtsü ashi aser nüburtemi "new world" yanglutetba atema tenüngsang agütsü.

Tiananmen Square nungi ghonda ka shi jembiba mapang Xi-i China indang mitkar tali tashi itshitsü nangzük, Taiwan 'reunification' asütsü ashi aser China indang security aser sovereignty wazüka ayuba mapang Hong Kong nung tensa tajungba kumdaktsütsü, ta ashi.

"China nung aliba nüburtem ya alima tejen raksaba kisüng nung ajungba masü, parnoki alima tasen ka yanglutet. Socialism kisüngi China kumzükttetsü," ta People's Republic tentetsang, Mao Zedong sülen China nung tashi tulutiba lenir Xi-i ashi.

China ya COVID-19 tashidak wara poktetba nungi taneptsü anguba mapang Xi aser par party ya tashi itshia jenjang tajungba nung lir.

Saka Hong Kong nung nüburtem azüoktsü meranga tashiyim amshiba aser Xinjiang nung ethnic kin tila mejungi amshiba asoshi linük telungzük nung Beijing aitsür. Ajidang masü China nung

rongsenketsüng ainba tsütsü tarutsü nung jenjang mejungi akumtsü amai ajiteter.

US nung aliba Pew Research Center ajanga Bodhbarnü sayaba advanced economies 17 sayaba nung China ya jenjang mejungi sayur aser Xi dak temolung lemtetba ajema akumer.

China nung kodanga bendanger nem memesüshidaktsütsü, majemrepdaktsütsü mesüra mamokbangdaktsütsü, ta Xi-i Brehostibarnü ashi.

"Shibai itemji inyaktsü meranger, parnok indang tekolak tem China nung nütsüng billion 1.4 agi yangluba Great Wall of steel nung akosatsü," ta pai ashidang central Beijing nung nisung 70,000 adenshia alidak nungi teka maa agizük. Iba ojang ya China indang Twitter mesükba Weibo nung Brehostibarnep kanga bulua amshia liasü.

China mitkartem kanga kera renlokba ajanga kidanger aser anüolen linüktem shisabulu tali akumer, aser maneni sovereignty, security aser development wazüka ayutsü atema sepaitem temaba jenjangi ajungkettsü, ta Xi-i ashi.

"Asenoki national defense aser armed forces tekeraba nung renlokdaaktsütsüla," ta Central Military Commission nung mendenpuba, Xi-i ashi. Central Military Commission ajanga linük indang armed forces ya azüoker.

Taiwan dak sendakba ken o bentetsü aser China-i 'reunification' maparen tembangtsü ya akhi mapang nungi party indang teinyaktsü ka liasü, ta pai ashi.

"Taiwan Strait anütsülen linük meimertem densema China indang jala-jabaso ajungai linük meima külemi inyaktsüla aser 'Taiwan independence' sentong temolungtetba tulu nung raksatsütsüla," ta China tiri ashi.

Democracy yimya nung yimsü asüba Taiwan ya China-i par indang amai züngshir, aser parnoki iba asetkong anasai fighter jets aser bomber tem yoka par tashi azüoktsü meranger.

Hong Kong aser Macau indang jembiba mapang, China-i 'One Country, Two Systems' indang tezüluba nung aser tanüla nung alitsü, ta Xi-i ashi. 'One Country, Two Systems' kübok tesem ana nem ya tashi

balaka agüja lir.

Ajisüaaka küm ka tejakdang Hong Kong nung national security law benokba ajanga Beijing-i iba yimti nung tashi tali amshir, ta ajiteter. 1997 küm British nungeri China nem iba yimti amoktsüba temaitsü küm shia July 1 nü longkak aita arur, saka coronavirus mechi rally agitsü atema police temi memela.

Forbidden City nung linük lenirtem men alia fighter jets aser helicopter tem parnok ajanga yima süyia Brehostibarnü benjongmung ya tenzük. Iba mapang kentener 3,000 shii socialist ken kar tena liasü.

Mezüngbo Chinese Communist Party nung aluyimer aser mapa inyaktertem kisüng anioka liasü, saka meilongi shishilempaba aser entrepreneurship nung amsema Leninist yimya nung yimsü asü tenzük.

2020 küm iba party nung züngsem million 2.43 renloka, 2013 küm Xi tir akumba sülen küm ka nung nütsüng timtiba renlokbaji ibai liasü. Tang iba party nung züngsem million 95.15 lir, ta Bodhbarnü data sayaba nung shia lir.



# COVID-19 : Tuensang DTF senden amen



Tuensang, Chiteni/July 01, 2021: DC conference hall, Tuensang nung Tuensang District Task Force for COVID-19 senden agiba mapang, DC aser Chairman DTF Tuensang, Kumar Ramnikant-i telok den jembiba yangi noksa nung angur.

**Tuensang, Chiteni/July 01, 2021 (TYO):** Brehostibarnü (01.07.2021), DC aser Chairman DTF Tuensang, Kumar Ramnikant-i anir DC conference hall nung Tuensang District Task Force for COVID-19 senden menogo, ta sangdong ajanga metetdaksü.

Iba senden nung, district atema 'unlock-1' indang tetuyubatem dak sedakba nung teloki asadangshia jembiba. Lockdown ajanga takoksa ajurur alir dokan kiburtem nem agütsüba relief aid' nung osangtem züngsemtemi asadangshia liasü.

Dokan kibur aser taxi driver tem, shirnok vaccine agiogo, vaccination campaign shilem ama, tim department ajanga parnok nem "I AM VACCINATED" sticker agütsütsü, ta teloki metetdaksü.

Dokan nung amener/kibur tem atema, ADC & Administrator TTC, Ajit Kumar Verma aser COC-I nati temzüng aser inyakyim tem latettsütsüla. Saloon aser beauty parlour tem anogo ka thir lapoktsü, saka staff tem COVID-19 negative test report alitsüla.

COVID-19 Tuensang, Nodal officer, Dr. John-i, district nung COVID positivity rate aser Covid-19 indang statistical report metetdaksü. Kasa mapang, Dr.Sunep-i, COVID hospital Tuensang indang osangtem telok dang metetdaksü.

Maneni, kasa senden nung, SP Tuensang, Amit Nigam-i, DEF nung inyakerkem nem takok ngua vaccine agütsüba osang metetdaksü, koba DC-i, iba maparen takok anguba ya nübür ajak atema tatishitsü asütsü aser ajungmesotsü ta ashi.

## Directorate of School Education-i metetdaksür

**Dimapur, Chiteni/July 01, 2021 (TYO):** Principal Director, Directorate of School Education, Shanavas C, IAS-i sangdong ka ajanga, DEO/SDEO/Principal/Headmaster ajak dang G/HT atema, shirnok graduate scale indang tajangzüktem agidar, seniority list (Hindi) dak sendakba nung renemshitsü atema 25/07/21 anogo matongdang, teküboklen agüja aliba document tem agütsütsü asoshi metetdaksür.

Iba maparen dak sendakba nung, medemdangtsü aser mapa kuma inyaksü asoshi Sorkar dangi yoktsü atema nungdakba document tem Email

ID:dsehindi@gmail.com nung yoktetsü akok.

**Nüngdakba Document tem:**

1. First Appointment
2. Regularization Order
3. Mark sheet/Admit Card BA/MA(Hindi)
4. Mark sheet/Admit Card B.ED.

5. Supporting documents of Birth Certificate.

Maneni, nungdakba document tem magütsüba mesüra lateta aliba anogo süir sülen agütsüba document tem magizükba atema Directorate-i khuret magitsü, ta kasa sangdong nung shia lir.

**Happy Birthday**



**Toshimen Jamir (Thejong)**

Küm : 4

Talidak : Nepali Kashiram, Dimapur

Temeim jabaso küm 4 tashi Tsüngremer taochi nung len aniba asoshi Tsüngrem tenüng asanger, ano Tsüngremi na arishi talang den anema aliba maneni moajang ta onoki sarasademtsür.

~ Oja Oba & Ati Ajung

**OFFICE OF THE  
AO SENDEN**

H.Q: MOKOKCHUNG: NAGALAND  
Ph: 0369-2228896/ e-mail: aosenden@gmail.com  
Date: 01/07/2021

**MANGYIM LEMSATEPER**

Tang ama mangyim jashi mapang nung Ao Senden-i Govt. of Nagaland Advisor, asür Toshi Wungtung'er kinüngertem den mangyim jashi lemsateper. Pa ya nükla tajung aliba lennir ka aser nübürtem bendanga tenzükba lennir ka liasü. Pa asüba ajanga Nagaland nung nübürtem atema tetemjen lennir ka samaogo. Ano külen Ao kin atema 'ANÜKAPANG' tajung ka makai kumogo aser iba tawa süngdaksütsü tasak asütsü. Asür Toshi Wungtung-i toktsür aoba kinüngtsü aser kibong züngsemtem den onoki mangyim jashi lemsateper aser pa tanela tesünep nung anisüngzükdakjang ta sarasademtsür.

  
(Chubawati Longchar)  
President

  
(Imtipokym)  
Secretary

**OFFICE OF THE  
JAPUKONG SENSO SENDEN**

H.Q. Longchem, Dist. Mokokchung

**TENÜNGSANG AGÜTSÜR**

Mokokchung District kübok Lakhuni yimtsüng nungi Asür Chubawati'er jala, Er. Limanaro-i Engineer-in-Chief, NPWD, Government of Nagaland menden tongtetba atema, Japukong Senso Senden (JSS) ajanga nümatanga la nem tenüngsang agütsür.

Tarutsü nunga la nem anema aliba den la wadang ajak nung takok lidakjang ta JSS-i sarasademtsür.

Sd/-  
Imdongtangba  
President  
Japukong Senso Senden

Sd/-  
Toshisangba  
General Secretary  
Japukong Senso Senden

## Pelaba Lemsateper



**ASÜR YIMSENPERONG AO**  
6th August 1978 - 23rd June 2021

**Nenok tebelemer aser khu reta abener ajak kü dangi arung aser ni nenok nem anisüngzük agütsüdi.**  
Mathi 11:28

23rd June 2021 nung onoki kanga meima aliba Asür Yimsenperong Ao ajungbena iba akümüli toktsür aodang senotsü, nübo aser ajak dang tongtipangtiba sarasadem agi ozü nungita yarir nisung shia dang pelar ta tebang agi rasa meshiteteter.

Onoki tsünglanglen agüja alirtem dang kangasa pelar:

- 1) The Commandant, and all Rank and File , 4th NAP Battalion, Thizama : Nagaland.
- 2) The Company Commander, and all Rank and File, C Coy, 4th NAP Battalion.
- 3) Police Baptist Church, 4th NAP.
- 4) 4th NAP 'C' Coy Baptist Fellowship.
- 5) Sunday School Department C 'COY'.
- 6) Women Department 4th NAP.
- 7) Youth Department 4th NAP.
- 8) D' Coy & A'Coy 4th NAP.
- 9) NGO'S of 4th NAP.
- 10) Ao Union, 4th NAP Bn. Thizama.
- 11) Little Star Hr. Sec. School.
- 12) Class Apart 1986-1995 ( Don Bosco School )
- 13) Indisen Village Council.
- 14) Indisen Baptist Church.
- 15) Indisen Baptist Arogotsür.
- 16) Molungyimsen Kosasanger putu
- 17) Kohima Molungyimsen Senso Telongjem.
- 18) Kohima Molungyimsen Fellowship.
- 19) Dimapur Molungyimsen Senso Telongjem.
- 20) Friends from ATI
- 21) AA Unit, Kohima

Onoki nisung ajak metetshitetba atema kanga sasar, ajsüaka temolung taroktiba nungi nenok ajak dang pelar aser Tulusang Tsüngremi nenok ajak molamoshia moajang ta ozü sarasadem.

**Temeim Jabaso, Jala, Tsüraburtem aser Kinunger ajak.**

## MULUNGNEN O



**TASOBA :**  
1944

**TASÜBA :**  
29/06/2021

Onoki teti meima aliba tetsü tajungtila 29/06/2021 anogo kibubai jar oko, lai onok yutsür oaka la temeim onok den tati alitsü onoki la mamatsü.

Asür **Toshikala** (Molungyimsen) la shiranga aliba mapang nungi akümüli wadang tembangba mapang tashi kija, kibong, kiyonger, arogo, yimden aser lokti palalai, shirnokisa sarasadem nubu aser rongsen ajanga ozü den yaritepogo nenok ajak dang kanga pelaba lemsateper.

Nenok mapa tajung asoshi Tsüngremi maneni moajangma ta ozü sarasadem.

**Temeim kinungbu, chirnur, semchir, kinunger, anükapang**

## OZÜI MEYIPA AGIR

Nei Social Media nung koba Watienla indang Audio aser noksa yoka ali aji tai ta nei meyipa agir.

Sd/-  
Tiatula  
Mokokchung

